

Noo Mian- Cabdil jees

1 Nish tra rug Yeesey ayns Bethlehem dy Yudea, rish
lhing ree Herod, cur my ner haink deiney-creeney
veih'n shiar gys Jerusalem,

2 Gra, Cre vel ree ny Hewlyn t'er jeet er y theihll? son
honnick shin y rollage echey ayns y shiar, as ta shin er
jeet dy chur ooashley da.

3 Tra cheayll ree Herod shoh, v'eh dy mooar seaghnit,
as ooilley Jerusalem mārish.

4 As tra v'eh er symney cooidjagh ooilley ny
ardsaggyrtyn, as scrudeyrynn y phobble, denee eh jeu
cre'n raad va Creest dy heet er y theihll.

5 As dooyrt adsyn rish, Ayns Bethlehem dy Yudea: son
shoh myr te scruit liorish y phadeyr:

6 As uss Vethlehem ayns cheer Yudea, cha nee oo sloo
ta mastey princeyn Yuda: son assyd's hig Kiannoort
nee reill my phobble Israel.


7 Eisht hug Herod fys follit er ny deiney creeney, as
deysht eh ad dy imneagh mychione y traa haink yn
rollage rish.

8 As hug eh ad gys Bethlehem, gra, Immeejee,
as shirjee magh dy jeidjagh son y lhiannoo, as tra vees
shiu er gheddyn magh eh, tar-jee lesh fys hym's, dy
voddym's neesht cheet as ooashley 'choyrt da.

9 Erreish daue v'er chlashtyn y ree, jimmee ad
rhymboo, as cur-myn-er hie yn rollage honnick ad
ayns y shiar er e toshiaght roue, derrey haink ee, as
hass ee erskyn yn ynnyd raad va'n lhiannoo.

10 Tra honnick ad y rollage, va boggey erskyn-towse
orroo.

11 As goll stiagh 'sy thie, hooar ad y lhiannoo marish
Moirrey e voir, as glooney sheese, hug ad ooashley



da as fosley ny tashtaghyn oc, heb ad giootyn da; airh,
as frankincense, as myrrh.

12 As myr va Jee er chur raaue daue ayns ashlish, gyn ad
dy hyndaa gys Herod, ghow ad raad elley gys nyn jeer
hene.

13 As tra v'ad er n'immeeaght, cur-myn-er haink ainle y Chiarn
gys Joseph ayns ashlish, gra, Trog-ort, gow ynlhiannoo as e voir,
cosne royd gys Egypt, as fuirree ayns shen derrey veryms
fys hood: son shirree Herod y lhiannoo dy stroie eh.

14 Eisht dirree eh, as ghow eh yn lhiannoo, as e voir ayns
yn oie, as hie eh roish er-chea gys Egypt:

15 As shen y raad v'eh derrey baase Herod: as shoh myr
va cooilleenit shen loayr y Chiarn liorish y phadeyr,
gra, Magh ass Egypt deie mee er my vac.

16 Eisht Herod toiggal dy row eh mollit liorish ny
deiney-creeney, v'eh erskyn-towse eulyssagh, as hug
eh magh sarey, as varr eh ooilley ny lhiennoo-mec
v'ayns Bethlehem, as ayns ooilley ny ardyn shen,
veih daa vlein dy eash as fo, corrym rish y traa v'eh
dy imneagh er vriaght jeh ny deiney creeney.

17 Shen y traa va cooilleenit ny va loayrit liorish Jeremy
yn phadeyr, gra,

18 Ayns Rama va eam treih er ny chlashtyn, yllaghey as
keayne, as dobberan hrimshagh, Rachel keayne son
e cloan, as gobbal dy ve er ny gherjaghey, er-yn-oyr
nagh row ad er-mayrn.

19 Agh lurg baase Herod, cur-myn-er haink ainle y
Chiarn ayns ashlish gys Joseph ayns Egypt,

20 Gra, Irree, as gow yn lhiannoo as e voir, as immee gys
cheer Israel: son t'adsyn marroo va shleeuit er bioys y
lhiannoo.

21 As dirree eh, as ghow eh yn lhiannoo as e voir, as
haink eh gys cheer Israel.

22 Agh clashtyn dy row Archelaus reill ayns Judea, ayns
ynnyd e ayr Herod, va aggle er dy gholl gys shen: agh
myr va Jee er chur roish ayns ashlish, hyndaa eh gys
ardjyn Ghalilee.

23 As jimmee eh dy chummal ayns ardvalley
enmyssit Nazareth: as shoh myr va cooilleenit shen loayr ny
phadeyrynn, Bee eh enmyssit ny Nazarene.